

## 1 Intro

*Melodie: «Tatü Tata» - EAV*

Notruf uf em Poschte. D Frau Meier isch's. Sie schreit:  
Im Garte isch e Bagger, wo mis Rüebibeet zerleit!  
Im Spurt si mir am Tatort. Entwarnig! Nur ke Schiss!  
Dr Meier schafft bi Marti-Bau und hüt het er halt Home-Office.



Refr.  
Tatü tata tatü tato!  
Bevor dr Virus agriifft, si mir scho lengschtens do.  
Tatü tata, d Corona-Tschuggerei  
Isch überall und immer do und macht däm Virus Bei!


Ar Wiehnacht hei mir d Gottesdiensch-Teilnähmer kontrolliert.  
Bir Chrippe glotze Ochs und Esel einsam und fruschriert.  
Maria, Josef, s Chindli, d Hirte, hei jetz dr Salat:  
Die stöh im Schnee voruss, will die hei keis Zertifikat!

Ir Bahnhofs-Toilette hocke Type – nid ganz ghüür.  
Dr eint zieht grad e Sprütze uf. Dr ander hebt em s Füür.  
Die zwee hei gar ke Maske a. Mir wei scho afo schimpfe.  
Doch nei. Au mir chöi mol es Aug zuedrücke. Hauptsach si tüe impfe.

Refr  
Tatü tata tatü tato!  
Bevor dr Virus agriifft, si mir scho lengschtens do.  
Tatü tata! Dir wärdet gschützt  
Mir Gä alls. Bhüet ech Gott. Wurscht öb s öppis nützt!

## 2 Sondereinheit BÜSIS: Was isch passiert?

*Melodie: "Noone else was in the room where it happened" - Hamilton: L.M. Miranda*



Heiters scho ghört? Niemer weiss was passiert isch!!

*Tä tä täderädä!*

Was isch passiert? - I weiss es! - - - Bisch Du dr Blick? Bisch Du d' Wältwuche? - - - Nei!!

Mir, d Sondereinheit "Büsis" hei se jo verhaftet! - - - Die het d Maske nid agha!

Äuä! - - - Erpressig! - - - Die het sis Gheimnis könnt! - - - Isch är nid gimpft? - - - Mou!!

Was de?- Ebe nes Gheimnis. - Privatsach! - Dateschutz! - Goht niemer öppis aa.

Hesch es scho ghört? Niemer weiss was passiert isch, niemer weiss was passiert isch, niemer weiss was passiert isch

Dasch unerhört! Niemer weiss was passiert isch, niemer weiss was passiert isch, niemer weiss was passiert isch

Jo wenn dr Chef involviert isch, weiss me nid was passiert isch wil vilicht öpper gschmiert isch

Drum: Wenn vo Bärn informiert bisch - chasch sicher si, dass nie me weisch, was passiert isch!

*Tä tä täderädä!*

Schwanger?! - Wie ächt? - Zwöi, drü Mol Augebraue waggel und scho bingo!

Die het e fiini Antenne! - - - Füüf G? - Drü G! - Zwei G! - Röti-Quéé? - - - Nei!!

I däm Fall goht's nur um Ei - - - G - - - Punkt!! - - - Und jetz? -

Schweigegeld? - Schmerzensgeld? - Sprungprämie!? - Psst! - Schaden-ersatz! -

Wäm si Schade? - Psssssssssssst!

Das isch doch gheim! - Niemer weiss was passiert isch, niemer weiss was passiert isch, niemer weiss was passiert isch

Isch si deheim abserviert? - i dr Psychi interniert? - Ustrangiert? - niemer weiss was passiert isch

Jo wenn dr Chef involviert isch - weiss me nid was passiert isch und wievil budgetiert isch.

Immerhin: Wenn's z Bärn passiert isch - chasch sicher si, dass es vo **Dir** finanziert isch!

*Tä tä täderädä!* Wenigschtens so vil weiss me!

#### 4 Statt Polizei

*Melodie: Klassisch Basel*


D Stadt Gränche wott schints uf ne Polizei verzichte.  
Dä Schutz nütz nüt und tüegi vil zvil Gäld vernichte.  
Jetz müesse mir sogar mol d Gräncher unterstütze!  
Me schützt jo würklech nume das, wo me muess schütze.



## 5 Alli hälfte

Melodie: "I can help" - Billy Swan

Was seit dr Wladi Putin zu sim Kolleg in Kiew:  
"Du chasch jo nid regiere! Du bisch e schlächte Chef! –  
I chume z Hilf!  
Wart Du nur, I chume z Hilf!  
Bi üs i dr Regierig hilfft nur s Susi –  
Dr Räschte stoht im Schilf!



Was säge d Stedtlischiiisser wenn Euch Corona droht?  
Wenn wider mol e Fasnacht nid über d Bühni goht!  
Mir chöme z Hilf!  
Lachet nur! Mir chöme z Hilf!  
Wär meint Corona sig nid luschtig  
Stoht im Schilf. Mir chöme z Hilf!

Was seit es rosigs Säuli im Spital zur Empfangsperson?  
"Fräset de nid alles! – S Härz isch für ne Transplantation!"  
I chume z Hilf!!

Dr Vinzens hilfft de Banke. Dr Bichsel hilfft em Wii.  
Dr Alain hilfft de Chranke. Und dr Pharmainduschtrie.  
Si chöme z Hilf! Jo, jo, jo, si chöme z Hilf!  
Dr Tierarzt hilfft de Chälber. Dr Maudet hilfft em Scheich.  
S Bluemehus hilfft sich sälber. Dr Ankli isch drum weich.  
Si chöme z Hilf! Jo, jo, jo, si chöme z Hilf!  
Dr Ringier-Boss hilfft nur no dr Regierig –  
Dä stoht wüescht im Schilf!

Und was seit d Frau Kantonsarzt de Schuele vom Kanton?  
"Wär d Chind nid zwänzg Mol teschtet, chunnt bi mir uf d' Intensivstation!!"

I chume z Hilf!! **Hilfe! flüchtet! bhüet üs Gott! nämet dere dr Hammer weg!!**



## 6 Rocky Corona

*Melodie: "Eye of the tiger" - Rocky IV)*

Mini Chind legge kei Maske aa!

Si chöi nümme schnuufe, me ghört nümme was si säge.

Mini Chind schick i nümme i d Schuel,  
Solang s Affe git, wo d Maske nid träge!

Mini Chind spöie nümme i die Töpf!

Si hei Chopfweh vom Gurgle und chotze!

Mini Chind si keini unsolidarische Tröpf!  
Tüe nid wäg jedem Chöderli motze.

Mine Chind droht ir Schuel Läbensgfohr!

Und deheime verbreite si d Viire.

Mini Chind lehre nüt me ir Schuel! Dasch doch d Gfohr

Wenn d Lehrer nur Corona-Stuss liire!

Jetzt isch Gnuet! Ab i d Schuel! Es goht ums Wohl vo de Chind!

Dene Type gäh mir jetzt mol uf e Ranze!

Schutt is Füdle! E rächte Hooge und e Brätsch voll a Grind!

Und e Gingg und e Fuuscht zmitts i Buuch - do nimm, du Wanze!

*Instrumental 'bumm, bummbumm bumm' + Dazwischen gerufen:*

... Coronalügner!

... Verfassigsfind!

Schwurpler! Schloofschoof!

Berset-Arschkriecherin!

Verschwörigstheoretiker ! Rächtsextremische!

Pharmalobbyische!

Spinner! Esoteriker! Diktaturfründin!

*Sprecher aus dem off - weiterprügeln:*

"Solothurn meldet heute 8 Neueintritte auf der Intensivstation - im Zusammenhang mit Corona!«



## 7 Dr Booster

*Melodie: "Campari Soda" - Taxi*

Zum Booster nimm i nur Moderna!  
Das schützt mi guet und git mer warm.  
Mit Pfizer wird ig immer heiser.  
Und Sinopharm chert mir dr Darm.

Zum Booster nimm i drum Moderna!  
I füehl mi sicher und bewacht.  
Und richtig früsch nach jeder Dosis.  
Zum Zmorge, z Mittag und zum Znacht.



## 8 Corona Adieu

*Melodie: «Schade dass Du gehen musst» - Reinhard Mey*

Schad dass du jetz plötzlech gohsch, nimmsch eifach dr Huet  
S wär doch gar nid nötig gsy, mir finde di guet  
Du seisch eifach "Ade, tschüss". Hesch doch gar ke Grund.  
Weisch denn was jetz ohni di - brätsch uf üs zue chunnt?

Maske wägg, dä Schock wenn wieder alli Gsichter blüttle,  
D Händ tuesch nümme wäsche, drfür wider jedem schüttle.  
Schülerdisziplin adé: Radau scho vor de Zäne!  
Bis jetz het s nämlech gheisse: "Schwig, - süsch chunnsch i d Quarantäne".

Stau hets wieder uf dr Strooss, - wäg allne dene Affe  
Schlimmer no: Statt Homeoffice – heisst's plötzlech wieder: schaffe!  
Nei, Corona, du blibsch do - du bringsch üs süsch in Nöt.

Dasch e Befähl! Im Herbscht goht s wider los, und jede gseht:  
Nach Alpha, Delta, Omikron - het's no Platz im Alphabet.

